

# 關愛的故事



## 寄養家庭

我姓李，有 16 個細路。你地唔好誤會我係「多仔公」，其實我係寄養家庭嘅家長。

寄養家庭係為十八歲以下，因為種種緣故而缺乏屋企人照顧嘅小朋友，提供家庭式嘅照顧服務，我就擔任佢地嘅「臨時父母」，等佢地可以繼續享受好似係屋企嘅家庭生活，直至佢地能夠與家人團聚、入住領養家庭，又或者可以獨立生活為止。

我擔任寄養家庭家長已經有十年時間，湊過嘅小朋友有 16 個，其中有 9 個仲係 BB。為咗佢地，我仲走去上堂，學點樣幫 BB 按摩同掃風。我最大嘅滿足感就係睇到佢地食得瞓得，由 5、6 磅，長大到 20、30 磅，真係好開心，我地直情當佢地係自己子女看待。

不過，當佢地嘅爸爸媽媽或者領養家庭要接佢地走嘅時候，真係好唔捨得，但唸到佢地有一個新嘅開始，可以返番父母身邊，或者搵到一個愛錫佢地嘅家庭，我都打戥佢地開心。我嘅任務同希望，咪就係想佢地幸福之嘛，你有無興趣都加入做「寄養家庭」？

(368 字)